

Buna sira, munsû e madami,
av salût onche a nom ad tûcc j'ater,
noi con voi, axì chî 'nt u teàter:
l'è da in ani ch'a s'eru 'ncuntrà.

E u j'è stacc tonc afâri 'nt in ani,
ant el mond, an sità e a Ruma,
s'im dèj temp in mumènt na parlûma:
stèm da senti, madami e munsû!

An sità u j'è stacc tonc afâri:
j'hon finì u sotopasso 'sta vota,
chî ch'l'ha facc is prugèt a l'è'n' piota
ma còi càmio us pò nenta pasè

E us pò gnònca pasè 'n biciclêta,
el cursij j'hon faci trop strîci:
gnènte pûlman, nè camio, nè bici,
èv capì? Per pasè bsò 'ndè (a) pè!

Poi rangiònda j giardèn, cari siuri,
j'hon bità 'nche l'urlòg "floreale"
xè cùj fiùr profûma, meno male,
j fon quasi sparì j atr'udùr;

perchè 'n pò dapertût s'a uardûma,
l'è tût pen ad cartàsa e d'armènta
e la gent l'ha semp pòu d'andè 'n drencia
ant j rest ch'j hon lasà i gat e i con.

E u bsò 'ncûra parlè d'j ambulanti,
pòvra gent a cmè mè pr'andè vendi
chî e là coi sò bonc e 'l sò tendì,
a Lisòndia j sòn pû 'ndò bitès.

L'asesûr l'ava facc fè u trasbordo
perchè 'n piàsa Ratàs j'ambaràsu,
e 'nche 'n piàsa Savon-na s'is piàsu
l'è 'n afâri ch'el va nenta ben!

Al finis che s'j vòru piasèsi
bsò 'ndè fora 'd sità, 'n mes al cani
o magàra 'ndè suta 'l pont 'd Tani:
là u j'è j pès e j ston cìtu 'd sicûr!

Onche l'ACNA di Cengio l'è frêscà,
u j'è 'n mûg d'uperàj xi la 'n drenta
dì e nòcc j pruduvu 'd l'armènta
e poi dop im la sbàtu xi chî!

E che bei sindacati 'n Ligûria:
ina roba j'hon dîcc, ben stidiàja:
l'impurtònt l'è la classe uperàja,
s'j jon l'armenta 'n Piemònt, pès per lur!

J'uma avì i campionati del mondo:
an Italia j'hon facc tonc afàri,
da Tirèn, a Palermo, a Bari
us parlava pì 'nmache 'd balòn!

Per rifè tûcc s'j stadi di calcio
j'hon spendi di miliardi e miliardi
e sgagià, sednò poi l'era tardi...
tònt ch'el paga l'è sèmp Pantalòn!

L'è pasà pochi mèjs, cari siùri,
e cùj stadi d'la gloria pasàja
j son quasi cmè tera vangàja:
j von ben da piantè j arciciòc!

I fransèjs e j inglèis, tûcc ansèma,
a j'hon facc ina gron cerimon-nia
perchè j'avu finì, sut la Mon-nia,
cul gron bogg ch'j spiciàvu da 'n pès.

Tont burdèl per in bogg sut la mon-nia:
me 'm son facc in bugèn ant'er bràji
ma silensio: is son pena s-ciancàji,
el burdèl pò u l'ha facc me mujè!

Dop el crollo del muro 'd Berlino
finalment la Germania l'è ûnìja
e la guèra, da 'n pès ch'l'è finìja,
l'ava 'ncùr lasà 'ndrèra sulè.

J'uma vist Gorbaciòv, con la Rùssia
e j pais ad l'Europa orientale,
ch'j'hon dicis ad cambiè, meno male,
e tont robi j cambèju da bon.

Tucc i pòpul del mond j capissu,
i pais ch'j eru russ j cambèju:
s'j'hon da piè 'na strà nova, j la pèju,
l'Albania la combia 'nche lè!

U j'è semp el prublema del "Golfo":
per risòlvli uj va tatto e giudissi,
ma da là u j'è jèn pen 'd caprissi,
l'ha 'na testa ch'l'è pes 'd Toni fiss!

Ant el mond u j'è tropa malissia,
tòncia popul armà 'nt tut la tèra,
ùj n'è tropi ch'j vòru la guèra
(e pò j disu ch'j vòru la pàs).

Meno male che a Ruma u j'è 'l Papa,
'na person-na ben degna e ben sònta
che 'd prùdènsa u na j'ha semper tonta,
l'è 'n bon pari per tùcc ant el mond.

U bsurrèjsa stè tùcc ben da senti
se ch'u dīs cula sònta person-na:
'na parola semp giùsta e semp bon-na
per l'amur, la giustissia, la pas.

Augùrùma la pas der famij,
la cuncòrdia fra i popul d'ra tèra,
e ch'us senta mai pù parlè 'd guèra,
ch'ùj triònfà l'amùr e la pas.

Per Nadàl l'è l'auguri 'd Gilindu:
con suchì j'ho finì la puisija,
av presènt j pastùr d'ra famija,
e cmensùma Gilindu per voi.